

RAGHU-VANSA.

CAPUT I.

PROFECTIO IN VASISHTHÆ EREMUM.

1. Vocis sensusque instar junctos, ad impetrandam vocum sensuumque intelligentiam, invoco mundi parentes, PARVATIM atque SIVAM.
2. Ubi est stirps a sole oriunda? ubi ingenium meum angustum? oceanum, trajectu difficilem, stultitia actus rate sum trajecturus.
3. Ineptus, poetæ gloriam affectans, abeam in derisionem, hominis pusilli instar, avide manus tendentis ad fructum, quem non nisi procerus attingere potest.
4. At vero introitus meus in hanc stirpem, ad quam vates priores carminibus suis januam paraverunt, est veluti fili introitus in gemmam, adamante perforatam.
5. Ille ego inde a natalibus lustratorum, ad operis finem usque in labore perseverantium, ad oceanum usque terram moderantium, quin ad cœlum curribus vectorum;
6. Rite ignem colentium, petentibus desiderata præbentium, pœnas delictis congruas infligentium, prout tempus postulabat vigilantium;
7. Largiendi caussa opes colligentium, veri probandi caussa verbis disertis loquentium, gloriæ caussa victoriam appetentium, prosapiæ caussa cum uxoribus habitantium;